

[1] Bene ergo exilium tulit Marcellus nec quicquam in animo eius mutavit loci mutatio, quamvis eam paupertas sequeretur; in qua nihil mali esse, quisquis modo nondum pervenit in insaniam omnia subvertentis avaritiae atque luxuriae, intellegit. Quantulum enim est quod in tutelam hominis necessarium est! Et cum deesse hoc potest, ullam modo virtutem habenti?

[2] Quod ad me quidem pertinet, intellego me non opes sed occupationes perdidisse. Corporis exigua desideria sunt: frigus summoveri vult, alimentis famem ac sitim extinguere; quidquid extra concupiscitur, vitis, non usibus laboratur. Non est necesse omne perscrutari profundum nec strage animalium ventrem onerare nec conchylia ultimi maris ex ignoto litore eruere: di istos deaeque perdant, quorum luxuria tam invidiosi imperii fines transcendit!

[3] Ultra Phasin capi volunt, quod ambitiosam popinam instruat, nec piget a Parthis, a quibus nondum poenas repetimus, aves petere. Undique convehunt omnia nota fastidientium gulae; quod dissolutus delicis stomachus vix admittat, ab ultimo portatur oceano; vomunt ut edant, edunt ut vomant, et epulas, quas toto orbe conquirunt nec concoquere dignantur. Ista si quis despicit, quid illi paupertas nocet? Si quis concupiscit, illi paupertas etiam prodest; invitus enim sanatur et, si remedia ne coactus quidem recipit, interim certe, dum non potest, illa nolenti similis est.

[4] C. Caesar, quem mihi videtur rerum natura edidisse, ut ostenderet quid summa vitia in summa fortuna possent, centiens sestertio cenavit uno die; et in hoc omnium adiutus ingenio vix tamen invenit, quomodo trium provinciarum tributum una cena fieret.

[5] O miserabilis, quorum palatum nisi ad pretiosos cibos non excitatur! Pretiosos autem non eximius sapor aut aliqua faucium dulcedo, sed raritas et difficultas parandi facit. Alioquin, si ad sanam illis mentem placeat reverti, quid opus est tot artibus ventri servientibus? Quid mercaturis? Quid vastatione silvarum? Quid profundis perscrutatione? Passim iacent alimenta, quae rerum natura omnibus locis disposuit; sed haec velut caeci transeunt et omnes regiones pervagantur, maria traiciunt et, cum famem exiguo possint sedare, magno inritant.

[6] Libet dicere: 'Quid deducitis naveis? Quid manus et adversus feras et adversus homines armatis? Quid tanto tumultu discurritis? Quid opes opibus adgeritis? Non vultis cogitare, quam parva vobis corpora sint? Nonne furor et ultimus mentium error est, cum tam exiguum capiatis, cupere multum? Licet itaque augeatis census, promoveatis fines, numquam tamen corpora vestra laxabitis. Cum bene cesserit negotiatio, multum militia rettulerit, cum indagati undique cibi coierint, non habebitis, ubi istos apparatus vestros conlocetis.'

[7] Quid tam multa conquiritis? Scilicet maiores nostri, quorum virtus etiam nunc vitia nostra sustentat, infelicis erant, qui sibi manu sua parabant cibum, quibus terra cubile erat, quorum tecta nondum auro fulgebant, quorum templa nondum gemmis nitabant; itaque tunc per fictiles deos religiose iurabantur: qui illos invocaverant, ad hostem morituri, ne fallerent, redibant.

[8] Scilicet minus beate vivebat dictator noster, qui Samnitium legatos audivit, cum vilissimum cibum in foco ipse manu sua versaret – illa, qua iam saepe hostem percusserat laureamque in Capitolini Iovis gremio reposuerat – quam Apicius nostram memoriam vixit, qui in ea urbe, ex qua aliquando philosophi velut corruptores iuventutis abire iussi sunt, scientiam popinae professus disciplina sua saeculum infecit. Cuius exitum nosse operae pretium est.

[9] Cum sestertium milliens in culinam coniecisset, cum tot congiaria principum et ingens Capitolii vectigal singulis comisationibus exsorpsisset, aere alieno oppressus rationes suas tunc primum coactus inspexit: superfuturum sibi sestertium centiens computavit et velut in ultimam fame victurus, si in sestertio centiens vixisset, veneno vitam finivit.

[10] Quanta luxuria erat, cui centiens sestertium egestas fuit! I nunc et putā pecūniae modum ad rem pertinere, nōn animi. Sestertium centiens aliquis extimuit et quod alii vōtō petunt, venēnō fugit. Illi vērō tam prāvae mentis hominī ultima pōtiō salūberrima fuit: tunc venēna edēbat bibēbatque, cum inmēnsīs epulīs nōn dēlectārētur tantum, sed glōriārētur, cum vitia sua ostentāret, cum cīvitātem in luxuriam suam converteret, cum iuventūtem ad imitātiōnem suī sollicitāret etiam sine malīs exemplīs per sē docilem.

[11] Haec accidunt dīvitiās non ad ratiōnem revocantibus, cuius certī fīnēs sunt, sed ad vitiōsam cōnsuetudinē, cuius inmēnsū et incomprēnsibile arbitrium est. Cupiditātī nihil satis est, nātūrae satis est etiam parum. Nūllum ergō paupertās exulis incommodum habet; nūllum enim tam inops exilium est, quod nōn alendō hominī abundē fertile sit.